



Roland Vögli (AndaRojo), Elmar De-florin, Simona Caminada, Riccarda Vedana (Acavoce), Olivia Spinatsch, Benedetto Vigne, Curdin Nicolay, Rezia Ladina, Corin Curschellas, Olivier Pernet (Bulais), Susanna Sabbadini, Mirco Manetsch (Pobufibanox). MAD

Top Pop Spezial: Dudesch vuschs per ina balla

■ (cp) **Finalmain ina chanzun da ballape per rumantsch! La cuminanza da vuschs rumantschas sa numna La Squadra 08 e chanta «Balla balla balla!». Envidada dal Radio Rumantsch.**

La chanzun da ballape ha auta conjunctura! Ed uss er anc ina per rumantsch? Ma atenziun: La «Balla balla balla!», chantada da La Squadra 08, n'è oriundamain betg vegnida concipida per l'Euro 08. Emprim motiv per questa produziun speziala entaifer la retscha Top Pop dal Radio Rumantsch è l'Europeada, il campinadi da ballape da las minoritads europeicas, ch'ha lieu dals 31 da matg enfin ils 7 da zercladur en Surselva.

«Ma jau vuleva tuttina far ina chanzun cun in messadi che po valair er per l'Euro e che cuzza vinavant, tant per campinada

dis futurs u per il simpel giu regional», declera *Benedetto Vigne*, l'autur e cumpo-nist da la chanzun. E perquai schlargia il text subtilmain la tematica «minoritads» ed include munds negligids en general: En il refrain cumpara per exempel l'Africa, ed en in auter lieu salida *Birgit Prinz*, la campionesa mundiala dal ballape feminin.

Equiliber tranter umens e dunnas regia dentant en l'interpretaziun da la chanzun: Vigne ha giavischà da repeter experientschas da gruppa fatgas en autras occasiuns musicalas rumantschas – Forza Flurina, Prisas-Reprisas – ed ha envidà 6 chantants e 6 chantantas da la scena indigena a participar a la registraziun dal song, in pau a la moda da «We Are The World». Ina bella cuminanza da vuschs

che tanscha da *Corin Curschellas* enfin tar *Curdin Nicolay* intunescha uss alternond las strofes da «Balla balla balla!» – la chanzun che savess propi daventar in imni rumantsch da ballape. Per entant en il radio e sin l'internet (www.rtr.ch).

Top Pop Rumantsch è in label per purschidas innovativas ed unicas en il program da musica da RR. Las emprimas dudesch chanzuns da la retscha èn cumparidas sin il disc cumpact «Top Pop Rumantsch, Vol. I, 2005–2007», da retrair tar: Radio Rumantsch, Via Masans 2, 7002 Cuira, u: www.rtr.ch.

Text e musica: Benedetto Vigne
Producziun: Manfred Zazzi
Musicists: Jean Pierre Von Dach (ghitarras), Christian Roffler (clavazin), Danny Hertach (bass), Muso Stamm (batteria).

Balla balla balla!

Balla balla balla
e sgola ent' il gol
balla balla balla
da l'Africa enfin il Pol

Jau ves quarantaquatter chommas
a curre sur il verd
jau daudel fans ch'èn fiu e flomma
far undas e concert
e l'arbitrader or che tschivla reglas
dat chartas a l'entort
e damas portan rosas, neglas
bandiras a noss sport

Balla balla balla

e sgola ent' il gol
balla balla balla
da l'Africa enfin il Pol

Bainvegni a las milli linguas
dal mund en nossa val
bainvegni a las bravas squadras
ch'aspiran al pocal
e tut ils giuvens giu che chantan imnis
e coluran il chapè
e tuttas mattas cloman viva!
al giu da ballapè

Balla balla balla
dal vest enfin il ost

balla balla balla
ils giogaders èn gia tuts sin post

Salids a vus da Maradona
da Zinedine Zidane
auguris 'vain da tut ils maisters
ed er da Birgit Prinz
e tuts ensem fan cun
nus la festa
da qua e dal lontan
la balla quella ans unescha
ils gronds ed ils pli pins

Balla balla balla
e sgola ent' il gol ...